

[0] 犀利婆婆

[1] 婆婆買咗青青最鍾意食嘅炒栗子，青青好開心，仲同婆婆一齊食咗幾粒。之後佢哋一齊去搵巴婆婆同青青嘅好朋友——巴仔飲茶。

巴婆婆一家係喺印度嚟嘅，佢哋一家都好香㗎，唔知係用咩香水呢？青青好好奇，不過佢次次都唔記得問。

晏晝，青青同婆婆返到屋企，諗住繼續食炒栗子，點知碟上面嘅栗子冇晒啊！

[2] 究竟係邊個食晒啲栗子？

「唔通係狗仔小旺做嘅？」青青估。

小旺最鍾意食食食，一定係佢！

「但係，如果係小旺食咗嘅話，實會搞到一地都係栗子殼㗎。」婆婆話。

「係公公？但係公公有晒牙㗎啦㗎……係狸貓仔？」青青估。

狸貓仔係巴仔喺天台搵到嘅小動物，巴仔同佢做咗好朋友，不過狸貓仔好鍾意偷廚房啲嘢食。

但係啲栗子咁多，狸貓仔咁細隻，又點偷得晒？究竟係邊個食咗啲栗子呢？

[3] 「我有辦法！」婆婆突然講：「我哋可以整三個陷阱嚟捉賊！」

[4] 「不過，首先我哋要有多啲栗子嚟做陷阱㗎。」婆婆帶青青入廚房。

「乜啲栗子唔係食晒喇咩？」青青問。

「我靜雞雞收起咗一啲栗子，本來諗住今晚肚餓食嘅。」

青青聽到之後，對眼即刻發晒光，口水都流埋！

[5] 婆婆帶住青青，喺廚房、大廳同公公張梳化度，用籃、紙箱、膠桶同相機做咗三個陷阱，希望可以搵到係邊個食咗啲栗子。

[6] 幾個鐘後，青青突然叫住噉走去搵婆婆：「啲栗子唔見晒啊！」

[7] 婆婆跟住青青行出大廳，喺籃入面見唔到狸貓仔，紙箱下面見唔到小旺，相機都有出相紙，但係啲栗子就唔見晒。

[8] 究竟係邊個食晒啲栗子啊？

婆婆諗咗一陣。

[9] 突然, 婆婆指住青青:「啊! 我知啦! 係你!」

青青開始心虛, 唔敢正眼望婆婆.....

[10]「呢啲陷阱淨係得你知點整, 一定係你搞掂晒啲陷阱, 再食晒啲栗子!」

[11]「呀.....因為啲栗子實在太好食, 我忍唔住就.....」青青細細聲講。

[12] 婆婆摸咗吓青青個頭, 笑住話:「想食咪同我講囉! 不過栗子食太多對腸胃唔好, 不如我哋將剩低嘅栗子分畀巴婆婆, 等佢哋都試吓香港嘅街頭小食吖?」

[13]「好啊! 噉不如請埋巴仔食煨蕃薯、燒賣同魚蛋吖?」青青答。

[14] 等到婆婆同青青出返大廳, 點知.....檯上面嘅栗子又唔見咗!

[15]「啫啫啫.....」喺呢個時候, 房入面傳出食嘢聲.....原來係有晒牙都唔執輸嘅公公、仲有小旺同狸貓仔一齊偷食緊栗子啊!

00158p:《犀利婆婆》My Super Grandma

The CC BY 4.0 license REQUIRES that any reused or repurposed content must have the correct ATTRIBUTION. Please use the text below in your citations, printouts and copyright pages.

Attribution Text:

"My Super Grandma" (Cantonese), translated by [HamBaangLaang](#) (© HamBaangLaang, 2021), based on the original story, Ammachi's Incredible Investigation (English), written by Vinayak Varma, illustrated by Rajiv Eipe, supported by Oracle, published by Pratham Books (© Pratham Books, 2019) under a [CC BY 4.0](#) license, first released on [StoryWeaver](#).

[Find out more here: [HamBaangLaang Attribution terms and CC 4.0](#)]
